

## **HOEKOM AANSLUIT BY DIE NWKV?**

---

1. Die NWKV is 'n gevestigde, kredietwaardige organisasie wat sedert 1929 die stem is van die Wolboer. Die NWKV het veral kredietwaardigheid by Nasionale-, Provinsiale en Plaaslike Regering, Georganiseerde Landbou, asook Internasionale rolspelers soos IWTO, Ontwikkelingstrusts en Produsente Organisasies in ander wolproduserende lande soos Australië en Nieu-Zeeland. Hierdie netwerk kan nie anders as tot voordeel van sy lede wees nie.

Lede van die NWKV produseer meer as 80% van die Nasionale skeersel. Vyftig persent van die 10 000 lede van die NWKV is swart, opkomende en kommunale boere. Dit onderskei die NWKV van die meeste ander organisasies in die Georganiseerde Landbou, deurdat die NWKV verteenwoordigend van die Wolboere in SA en so deur Regerings-strukture aanvaar en erken word. 'n Memorandum van Ooreenkoms is opgestel en onderteken met die Departement van Landbou, Bosbou en Visserye wat 'n raamwerk vir toekomstige ontwikkelingsvennootskappe daarstel. Die institusionele omgewing sluit ook die IWTO, CEO Forum (met Dept. Landbou), Agri SA, Bedryfskamer, Wolstrukture, munisipaliteite, tersiëre opleidings-instansies ens. in.

2. Die missie van die NWKV is die daarstelling van volhoubare, winsgewende wolskaapboerdery in Suid-Afrika. Dit word nagestreef deur die volgende doelwitte:

### **2.1 Bevordering van 'n verbeterde beleids-en wetgewende omgewing.**

Die NWKV speel 'n belangrike rol om as verteenwoordige organisasie vir wolprodusente beleid en wetgewing te beïnvloed tot voordeel van die produsent.

Die NWKV het hier, as lid van die Bedryfskamer, direkte toegang tot Agri SA om sake van belang vir die wolboer, uitvoere en tariëwe, wetgewing, probleemdiërbeheer, veediefstal (tesame met RPO) en ander aspekte aan te spreek. Hierdie bedingingsmag word verder versterk deur die sluit van strategiese alliansies en sterk interaksie met ander organisasies binne die landbou-omgewing.

Ander beleidsaspekte sluit in nylon verpakking van wol, klasstandaarde (Springbokkop), Kode van Beste Praktyke, mulesing, dieregesondheid, ens.

### **2.2 Die daarstelling van 'n effektiewe produksie omgewing en die uitbreiding van wolskaapboerdery na geskikte produksiegebiede deur relevante opleidings- en ontwikkelingsprogramme.**

Die NWKV is een van slegs enkele kommoditeits-organisasies, wat beskik oor 'n Produksie Adviesdiens. Dit word op kontrak van Cape Wools SA uitgevoer, asook verskeie ander kontrakte met Departemente van Landbou Ontwikkelingstrusts, Plaaslike Munisipaliteite en Internasionale Donateurs. Die diens fokus op groepsaktiwiteite en individuele advies is moontlik op 'n kosteverhalende basis. Bykomend tot Produksie-advies, word daar ook 'n ekonomiese ontledingsdiens gelewer en onderhandelinge met die Eenheid vir Lewendehawe Ekonomie (by Universiteit Vrystaat) is reeds afgehandel en in plek. Die Kode van Beste Praktyke is

goedgekeur en boere het geleentheid om die verhandelingsverklaring te onderteken ter ondersteuning van die kode. Tersiere instellings sal die Kode ook by hul opleiding inskakel – Nog 'n NWKV inisiatief.

Die NWKV is 'n geakkrediteerde diensverskaffer by die AgriSETA. Opleiding sluit skeer, wolklas, basiese wolkaapproduksie, voeding, teling, dieregesondheid ens. in.

### **2.3 Die daarstelling van 'n verbeterde markomgewing.**

Hier is die fokus op die effektiewe funksionering van die mark, ontginning van nuwe markte, waardetoevoeging en markinligting.

Verskeie inisiatiewe is deur die NWKV geloods vanuit die NWKV Bemerkingskomitee en vandag is verskeie bemerkingsopsies vir boere beskikbaar, bo en behalwe die veiling. Tans geniet internasionale – en plaaslike promosie van wol aandag en is 'n SAWAMBA heffing in plek om aksies in die verband te befonds, insluitende die programme van die IWTO, die „campaigne for wool“ met Prins Charles as die internasionale voog, asook internasionale navorsingsprogramme gefokus op klimaatsverandering en die lewensiklus van wol en die impak op die natuur, ens. NWKV bestuur is ten nouste betrokke by plaaslike en internasionale bevordering van Suid-Afrikaanse skeersel, met groot sukses.

### **2.4 Daarstelling van 'n sterk produsente organisasie.**

Hoe meer lede en meer verteenwoordigend die NWKV van wolboere is, hoe sterker sy bedingingsmag binne die demokrasie. 'n Spreekbuis is in vandag se omstandighede onontbeerlik – die NWKV is juis dit vir wolprodusente. Kommunikasie via die Wolboer en NWKV webwerf op internet is bekend en kragtige media. Die NWKV het ook nou streekvergaderings, Provinsiale Jaarvergaderings en die Nasionale Kongres ingestel om kommunikasie met grondvlak te verbeter.

### **NWKV Opleiding – en Ontwikkelingsprogramme in kommunale gebiede.**

Hierdie program word gedeeltelik deur Cape Wools SA op kontrak befonds, tesame met ander kontrakte huidiglik ter waarde van nagenoeg R 20 miljoen. **GEEN LEDEGELD WORD HIERVOOR AANGEWEND NIE.**

Buite-kontrakte word huidiglik vanaf die volgende instansies ontvang:

- Nasionale, Provinsiale en Plaaslike Regering
- Buitelandse Ontwikkelingsfondse
- Ander Lewendehawe bedrywe
- AgriSETA

Agt voorligters (6 in Oos-Kaap; 2 in KZN) is ook deur die onderskeie Departemente van Landbou aan die NWKV geseondeer.

# STRUKTURE IN DIE WOLBEDRYF

---

Die Suid-Afrikaanse wolbedryf het in 1997 geherstruktureer ingevolge die bepalings van die nuwe Wet op Bemaking van landbouprodukte van 1996.

Die eerste stap was die stigting van 'n Wolforum, bestaande uit verteenwoordigers van die verskillende belangegroepes in die bedryf. Die Forum vergader twee keer per jaar en verteenwoordigers betaal hulle eie koste.

Die funksies van die Forum is onder meer:

- Om geleenthede te skep waar bedryfsprobleme bespreek kan word
- Die skep van 'n lewensvatbare sake-omgewing deur die bevordering van noodsaaklike navorsing, ontwikkeling en opleiding
- Die bevordering van Suid-Afrikaanse wol

## Cape Wools SA

Cape Wools SA is 'n maatskappy sonder winsbejag wat deur die Forum as sy uitvoerende arm gestig is. Die direksie van Cape Wools verteenwoordig proporsioneel die belangegroepes in die bedryf.

Om oorhoofse koste so laag as moontlik te hou en die maksimum fondse beskikbaar te stel vir die dienste en funksies wat deur die bedryf benodig word, het Cape Wools 'n klein personeel van ses en word die meeste van die funksies uitgekontraakteer. Die maatskappy behou egter die verantwoordelikheid vir die oorhoofse beplanning en die bestuur van al die funksies.

Cape Wools is die inkomstebegunstigde van die Woltrust en lê jaarliks 'n begroting vir goedkeuring aan die Trust voor. Sy funksies is soos volg:

- **Inligting en statistiek**

Cape Wools is in terme van die Bemakingswet op Landbouprodukte van 1996 aangewys as die amptelike instansie om bedryfsstatistiek te versamel en te verwerk. Die maatskappy is dus ook die enigste instansie wat 'n omvattende statistiese en inligtingsdiens verskaf met betroubare, objektiewe statistiek en inligting oor alle aspekte van die wolbedryf. Ten einde die voordeel van skaal te geniet en koste te bespaar, word die rekenaarprogrammering, -stelsels en datavaslegging op kontrak deur 'n eksterne diensverskaffer vir Cape Wools gedoen.

Prysontleidings en produksiestatistiek word onder meer aan die Internasionale Woltekstielorganisasie (IWTO), ander wolproduserende lande, die Departement van Landbou, Statistiek SA, die Departement van Handel en Nywerheid en landbou-ekonomie verskaf.

Cape Wools bied ook 'n objektiewe woltiperingsdiens vir statistiese doeleindes aan. Cape Wools het 'n webwerf, <http://www.capewools.co.za>, wat op veilingsdae die veilingspryse lewendig gee. SMS-boodskappe met die jongste markprys kan op

veilingsdae aan boere met selfone gestuur word. Markverslag word ook per e-pos uitgestuur.

- **Navorsing**

Dié funksie word aan navorsingsinstansies uitgekonnekteer. Navorsingsbehoefte word jaarliks d.m.v. bedryfsopnames geïdentifiseer en vordering met projekte word met die hulp van kundiges van buite op 'n deurlopende grondslag ontleed. 'n Standaard protokol is opgestel waarvolgens projekadministrasie en –vordering in terme van die kontrakte wat met individuele navorsingsinstansies aangeaan is, gekontroleer word.

- **Produksie-advies, opleiding en ontwikkeling**

Die produksie-advies- en opleidingsfunksies is aan die Nasionale Wolkwekersvereniging (NWKV) uitgekonnekteer. Dié diens is daarop gemik om produsente te help om doeltreffendheid te verhoog en hulle inkomste te maksimaliseer. Dit behels die oordra van produksietegnologie, produksienavorsing en –ontwikkeling en opleiding (veral aan dié boere wat voorheen nie toegang hiertoe gehad het nie) en die opleiding van skeerders. Die kontrak stel die NWKV in staat om ook vir beduidende eksterne fondse te beding om die funksies uit te voer.

- **Bevordering**

Wolbevordering bly 'n prioriteit vir die maatskappy en alle moontlikhede word ondersoek en geleenthede word benut om die Suid-Afrikaanse wolbedryf en wolprodukte op geskikte geleenthede te bevorder.

### **Die Woltrust**

Die Woltrust is in 1997 ingevolge die bepalings van die nuwe Wet op Bemaking van Landbouprodukte gestig. Dié wet bepaal dat bates wat landbouade onder die ou regering opgebou het, nie aan produsente uitbetaal mag word nie, maar na trusts oorgedra en tot voordeel van die hele bedryf aangewend moet word.

Die Woltrustakte bepaal dat daar 'n minimum van ses en 'n maksimum van sewe trustees aangestel word, waarvan een die handel, twee die produsente en een die Minister van landbou moet verteenwoordig. Die ander drie moet onafhanklike spesialiste op die gebied van bate- en finansiële bestuur wees. Die trustees (behalwe die Minister se verteenwoordiger) word deur die Wolforum aangewys. Die hoofdoelstellings van die Trust is die volgende:

- Om die bates te beskerm en produktief aan te wend om groei te verseker
- Die optimalisering van die bates en kapitaal ten einde die inkomstebegunstigde (Cape Wools) in staat te stel om bepaalde dienste wat deur die Wolforum aan hom opgedra is, aan die bedryf te lewer

Hoewel dit 'n diskresionêre trust is (hy kan besluit of daar genoegsame fondse vir die finansiering van bepaalde dienste is), is daar sekere beperkings. Die trustees is ook onder verpligting om toe te sien dat slegs aktiwiteite wat voldoen aan die bepalings van die trustakte en tot algemene voordeel van die wolbedryf strek, befonds word. Die Trust moet ook aan Cape Wools as die inkomstebegunstigde rapporteer oor sy aktiwiteite. Dit bevorder wedersydse kommunikasie vir die bevordering van doeltreffende bestuur.

Vir meer inligting skakel Cape Wools by (041) 4844301  
E-pos: [capewool@capewools.co.za](mailto:capewool@capewools.co.za) [www.capewools.co.za](http://www.capewools.co.za)